

儒林外史作者的遺集

文木山房集



卷之四

文木山房集



文木山房集卷四

全椒 吳敬梓 敏軒

詞

金縷曲

盛夏題霍公山房

何計鞭陰石只當天燭龍鞭火愁心如熾敗屋閒雲依破
衲松影北窗堆積看茶鼎風吹習習荷葉三枚延法慶寶
光師飛錫河婁國我相在竟誰識 山城梵宇巍然立嘆
幾時青鴛白馬又生荆棘假使泉明今尚在蓮社定須重
入霍公談先君子往事便滿眼惟餘俗物揮淚我來尋舊址悵遠公
頭白今成雪鐘樓外又斜日

滿江紅

夜雨空階尋短夢重衾寒戀記那日芳郊香徑桃花人面
樓上春暄開翠幙牕前侍女揮紈扇把紅紅白白幼芳詞

思量徧 武陵洞天台院路已失峯猶轉恰勝常道罷迴
眸難見山獺有情空抱木冰蠶到死仍留繭好風光如夢
復如塵腸千斷

又治山下忠貞公廟

子孝臣忠垂竹帛功名如許想當日直言正色褰裳衛主
北府軍兵遺恨在南朝君相清談誤便全家碧血染瑯戈
青溪路 國運改荒墳墓王者作新祠宇廟爲明太祖勅修看衣
冠劍佩精靈呵護獨嘆謝鯤稱放達堪羞王導虛名譽悵
千秋灑淚冶城邊聽春雨

念奴嬌 枕

薤紋冰簟早橫陳玉體寶釵斜墜酒醒夜闌纖手按牘有
助嬌花蕊膩髮絲牽凝脂香染臉暈回身未售家放處思
量怎地能睡 却笑古陌邯鄲盧郎高臥嘗盡愁滋味洛

水一篇思舊賦此物賺人流涕半世孤眠三更新夢惟爾
知蕉萃今宵無賴化爲蝴蝶相戲

蹋莎行

仄徑苔肥小池萍厚凭闌祇有人消瘦乍晴還雨暮寒多
餘香漸褪雙羅袖密約無憑愁腸依舊菱花知我眉間
皺濕雲如夢挂湘簾簾前春去空長晝

虞美人

題畫扇

殷紅淺綠傳毫楮按節猶能舞八千子弟盡銷磨記得兵
殘楚帳夜聞歌無端闌入江邊草又染丹青稿世人惟
解重嬌娃不見萋弘碧血化爲花

減字木蘭花

庚戌除夕客中

今年除夕風雪漫天人作客三十年來那得雙眉時暫開
不婚不宦嗜欲人生應減半鮑子知余滿酌屠蘇醉擁

爐

又

昔年游冶淮水鍾山朝復夜金盡牀頭壯士逢人面帶羞
王家曇首伎識歌聲春載酒白板橋西贏得才名曲部
知

又

田廬盡賣鄉里傳爲子弟戒年少何人肥馬輕裘笑我貧
買山而隱魂夢不隨溪谷穩又到江南客况窮愁雨不
堪

又

學書學劍懊恨古人吾不見株守殘編落魄諸生十二年
狂來自笑摸索曹劉誰信道唱盡春陽勾引今宵雪滿
門

又

哀哀吾父九載乘箕天上去弓冶箕裘手捧遺經血淚流
劬勞慈母野屋荒棺拋露久未卜牛眠何日瀧岡共一
阡

又

閨中人逝取冷中庭傷往事買得廚爨消盡衣邊荀令香
愁來覽鏡惟慙一毛生兩鬢欲覓良緣誰喚江郎一覺
眠

又

文瀾學海落筆千言徒灑灑家世科名康了惟聞鴉鵲聲
郎君乞相新例入貲須少壯西北長安欲往從之行路
難

又

奴逃僕散孤影尚存渴睡漢明日明年踪跡浮萍劇可憐
秦淮十里欲買數椽常寄此風雪喧豗何日笙歌畫舫
開

賀新涼

青然兄
生日

小院清無暑襯湘簾桐陰柳色階前過午痛飲綠醪今夕
酒此是謝庭瓊樹况更有兒郎阿虎服食神仙蓬島客紫
泥菱滿向冰盤貯千歲鶴爲君舞人間富貴雖朝露也
休學許家馬磨終身貧窶捉鼻低頭知不免且把碁枰共
賭莫問他故人何處小弟今年顛顚甚但銜杯不放銀蟾
去池草盡昔時句

惜紅衣

紫茱萸用
白石詞韻

嬌女烟飛新歌雲散倚秋無力點砌幽花明霞襯天碧土
化鴛鴦曾記取燒金仙客蕭寂斂折鳳鸞訪工人消息

平康巷陌佩解羅囊紅蕤枕相藉奇葩恰許掩冉芸牕北
試問鴈來霜後幾度小階巡歷只紫荆一樹何處照他顏
色

解語花

雨後
荷花

青萍乍破綠葉低翻掩映遙天罇香心撩惹還賸有珠顆
盈盈欲瀉碧筒堪把剛植向藥欄花榭愛多情水佩風裳
伴幾時間暇因憶錦帆銷夏露輕盈半面星眸頻射館
娃荒也誰提到玉樹後庭閒話江姝淚灑曾記取珠璫偷
卸到如今蓮步荷衣付雨婚風嫁元載聞荷中有聲如十
五六歲童子歌玉樹後
庭花

買陂塘

癸丑二月自全椒移家寄居秦淮水亭諸
君子高宴各賦看新漲二截見贈余既依

韻和之復爲詩餘
二闕以志感焉

少年時青谿九曲畫船曾記遊冶紉纚維處聞簫管多在

柳隄月榭朝復夜費蜀錦吳綾那惜纏頭價臣之壯也似
落鳬相如窮居仲蔚寂寞守蓬舍江南好未免閒情霑
惹風光又近春社茶鐺藥碓殘書卷移趁半江潮下無廣
廈聽快拂花梢燕子營巢話香銷燭炮看丁字簾邊團團
寒玉又向板橋挂

又

石頭城寒潮來去壯懷何處淘洗酒旗搖颺神鴉散休問
獼兒獅子南北史有幾許興亡轉眼成虛壘三山二水想
閱武堂前臨春閣畔自古占佳麗人間世只有繁華易
委關情固自難已偶然買宅秦淮岸殊覺勝于鄉里饑欲
死也不管干時似浙矛頭米身將隱矣召阮籍嵇康披襟
箕踞把酒共沈醉

洞仙歌

題朱草衣白
門偕隱圖

山圍故國正桃源紅綻恰向幽人畫圖看羨雙仙一種游
戲情懷多少事付與空江斷岸 被紉斟美酒琴韻簫聲
眉宇何須露精悍燕子語呢喃抱甕而歸烏衣巷夕陽零
亂我亦有閒庭兩三間在簾步青溪版橋西畔

沁園春

送別李
嘯村

春雨如絲假蓋衝泥訪余板橋嘆佯狂李白思原無敵工
愁吳質益用增勞水色縈牕衣香滿座共倚河亭短燭燒
驚心處又蒲帆高挂待趁新潮 黯然欲別魂消悵去住
難憑仗彩毫怕魚箋三萬僅能塗抹龍賓十二只解該嘲
開府清新參軍俊逸何日論文倒濁醪君思我在秦淮十
里楊柳千條

千秋歲

四月初一日金其旋
表兄五十初度寄祝

熟梅時候簾外薰風透梁燕乳庭花瘦堆盤烹白小洗殘

呼紅友千古事文章儘爲先生壽 伯玉知非後翁子窮
經久人漸老愁依舊彈琴看鬢影潑墨盈懷袖須念我一
春寂寞青溪口

金鏤曲

七月初五朱草
衣五十初度

織屨堂中客困風塵如流歲序行年五十南越北燕遊倦
矣白下鑿坏爲室似巢父一枝棲息昨夜桐風驚短夢把
園林萬綠都蕭瑟秋士感壯心迫 荀卿正遇遊齊日嘆
胸中著書千卷沈埋棄擲尚有及時一杯酒身後之名何
益張季膺斯言堪述天意也憐吾輩在且休憂塵世無相
識長壽考比金石

疎簾淡月

牆匡月轉漸霏滃秦淮牕影遮斷蕉萃黃花滿徑槿籬零
亂絲絲蒜髮羞臨水倦凭闌又成長歎板橋垂柳漁家繫

艇晚炊菰飯 正客子淒涼滿眼待香醪自煮綠蟻浮殘
三百青銅買得幾爐麩炭冷吟間醉原無味更何堪愁深
酒淺步櫺屐倚殘星數點兩行哀雁

月底修簫譜

鵲爐烟鸞鏡影記向畫屏見竹葉花裙白苧趁時翦是他
病後心情愁中風度幾曾帶玉釵金釧 錦堂畔早把銀
燭高燒重簾隔嬌面射覆分曹姊妹半宵讌只餘幾度迴
眸一聲長嘆瞞不過杏梁雙燕

滿江紅

雀化虹藏又過了今年冬序臨水檻寒潮綠減夕陽紅聚
幾處霜風催銍艾誰家夜月鳴機杼更木蘭椒葉蓋奚頭
糟牀注 豈合在他鄉住豈合被虛名誤盼故山榛莽先
人邱墓已負耦耕鄰父約漫思彈鋏侯門遇再休言得意

薦相如凌雲賦

礫牕寒

憶山居

薜荔牆邊藤蘿石上自然瀟灑長松百尺絕似虬龍高挂
嘆三年柴扉未開蛛絲網徧茅檐罅只晚驅黃犢霜楓紅
映夕陽西下 寒夜從容話枉眷戀秦淮水亭月榭撇却
家山紫翠丹青如畫想發醅春酒正濃綠楊村店雞豚社
幾多時北叟南鄰定盼余歸也

乳燕飛

甲寅除夕

令節窮愁裏念先人生兒不孝他鄉留滯風雪打牕寒徹
骨冰結秦淮之水自昨歲移居住此三十諸生成底用賺
虛名浪說攻經史捧卮酒淚痕滓 家聲科第從來美嘆
顛狂齊竽難合胡琴空碎數畝田園生計好又把膏腴輕
棄應媿煞穀貽孫子倘博將來椎牛祭總難酬罔極深恩

矣也略解此時恥

喝火令

題刺
繡圖

寶髻香螺染羅帶綠草齊新裁淡墨水田衣坐擁薤紋冰
簾團扇也相宜拂曉烟初斂當春鳥正啼自挑弱綫小
牕西絕勝樗蒲絕勝賭圍碁絕勝筍輿油壁花外蹋香泥
如此江山

一船離恨斜陽外遙凝數行穹翠亂藻橫陳崇蘭稚密才
過清明天氣魚兒燕子看飛入檣邊皺來波底綠柳青帘
趁虛人聚水中沚終宵眠亦未穩早月到篷牕好夜如
洗蠟屐誰家前羣那處偏我羈愁千里心驚不已嘆百五
韶光祇余餘幾雨甲烟苗菜花開偏矣

蹋莎行

鹿韭香濃雀瓢香細何人庭院春初霽還家兩月不曾過

又從江上招舟子 挑薺籬根焙茶牕際一般也有幽閒
事獨憐涉險總無端櫓聲軋軋波聲裏

小重山

三

雲勝凌波拂曙行回看烟霧裏別江城點頭沙鳥過遙汀
臨斷岸綠徧水香棧八字賈帆輕連宵春雨過浪花平
凭舷山影落牕櫺青天外何處曉霞明

燕山亭

蕪湖雨夜過
朱草衣舊宅

川后停波屏翳送寒搖蕩澄江青霧橋外數椽蘚蝕苔殷
映帶柳塘花塢燕子歸來知認否當年誰主無語銜落蕊
迎風繚垣低度 怊悵孤客淒清聽瑟瑟蕭蕭夜牕聲苦
梁市阮廚燭擡香銷知他故人何處他日相逢難說盡別
離情緒思汝同聽者半宵春雨

惜黃花

采石

江花紅蕖浪花綠漲過危磯憶當年謫仙情況燕子掠波
迴魚妾隨潮長但繫著幾行橫網騎鯨淒愴釣鰲疎放
古之人古之人祇今安往帶月臥孤篷醺酒催三槳也博
得十分酣暢

青玉案

塗次懷
王溯山

梨花寒食春將半記分袂溪橋畔別後頓教春又晚長隄
楊柳芳洲芝若綠徧江南岸應勞髯叟將余盼幾月遊
蹤似天遠遙憶瑟居情興嬾一簾烟雨半爐香霧坐聽流
鶯囀

慶清朝

李嘯村留
飲園亭

鴈膳堆盤龍脩滿徑儘堪留客舟旋纔通畫刺便教投轄
爲歡不用玉船瓊爨清談揮塵最相關園亭外鶉鳩喚雨
聲出林端多少暮雲春樹嘆別離蹤跡說也淒然空廊